

რუსეთის ეკლესია მთავარეპისკოპოს იერონიმესთან ურთიერთობების განწყვეთით იმუქრება, თუ საბერძნეთის ეკლესია ევქარისტიულ ურთიერთობას დაიწყებს უკრაინის ეკლესიასთან



რუსეთის მართლმადიდებელი ეკლესიის წმინდა სინოდი ათენისა და სრულიად ელადის მთავარეპისკოპოს იერონიმესთან ურთიერთობების განწყვეთით იმუქრება, იმ შემთხვევაში თუ საბერძნეთის ეკლესია ევქარისტიულ ურთიერთობას დაიწყებს უკრაინის მართლმადიდებელ ეკლესიასთან.

რუსეთის მართლმადიდებელი ეკლესიის სინოდმა ხუთშაბათს საგანგებო შეხვედრა გამართა, სადაც მიიღეს დოკუმენტი, რომლის თანახმადაც, მოსკოვი უკრაინის მართლმადიდებელ ეკლესიას „ერთ-ერთ უკრაინულ სქიზმატურ დაჯგუფებად“ მიიჩნევს, რაც ნიშნავს, რომ ის საეკლესიო მოღვაწეები, ვინც მათთან ევქარისტიულ კავშირში იქნებიან, ასევე ჩაითვლებიან სქიზმატებად (განხეთქილების შემტანებად), ამ შემთხვევაში კი მთავარეპისკოპოსი იერონიმეც.

ბერძნულმა ეკლესიამ უკრაინის მართლმადიდებელი ეკლესიის ავტოკეფალია რამდენიმე დღის წინ აღიარა, რის გამოც რუსეთის მართლმადიდებელი ეკლესია მსოფლიო პატრიარქ ბართლომეოსს ბერძნულ ეკლესიაზე ზეწოლაში სდებს ბრალს.

რუსეთის ეკლესიამ კონსტანტინოპოლთან ურთიერთობა მას შემდეგ განწყვიტა, რაც მსოფლიო საპატრიარქო კიევის პატრიარქ ფილარეტისა და მიტროპოლიტ მაკარისტვის ანათემის მოხსნის და იმ სინოდალური გადაწყვეტილების გაუქმების შესახებ გამოაცხადა, რომლითაც მოსკოვის პატრიარქს კიევის მიტროპოლიტის ხელდასხმა შეეძლო.

აღსანიშნავია, რომ რუსეთის მართლმადიდებელი ეკლესია მხოლოდ მოსკოვის საპატრიარქოს უკრაინულ მართლმადიდებელურ ეკლესიას აღიარებს, რომელიც მისი ავტონომიური ნაწილია.

- 1tv.ge